

## Al néta rogi

Ala fen de stagion, vers setember e utuber,  
una squadra de nèta foss, al ge' era  
al so dà fa de pulisia, cunt stivaj  
e atrèss, una netada cumplesiva,  
in tocc i foss de d' acquament, per fa se,  
che l' acqua la scuriva senza intopp.  
Ransa, rocula, badil, cunt olter atress,  
a duvevan tirà lucid tot quant al foss,  
taja, sbadila, sbat foeura ste rebelot,  
ognion al gh' era al so dà fa.  
Dala matina prest, al tramunt dela giornada,  
l' era un veru trambost continu, ciapa da che,  
tira dà là, sbatt in so la riva un broch,  
una palada de tera, una radiss, un sass,  
anca quel scioch d' erba.....la sumejava  
la pulisia d' un palass real.....ma sulament  
a l' era un laurà de prevension, un laurà  
de sistemasion, per l' avent dela prosima stagion.  
Foss maester, foss secundari, in pocc temp,  
eran nèt e lucidà, una vera passion  
per chi faseva sto laurà.....adèss  
tot chi foss le.....a l' è un post per spasadura,  
l' educasion l' è po quèla d' una volta,  
po reclaman per tanti rop che sucet,  
vedi semper sach e butigli de plastica  
duè gan menga de stà.....  
se questa l' è educasion, alura l' è propri bèla.

8-10-2017